

بِسْمِ اللَّهِ الرَّحْمَنِ الرَّحِيمِ



## Khutba Jummah

Hazrat Khalifatullah Muir. A. Azim (atba)

10 Avril 2020

16 Shabaan 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

### Bane Attributs d'Allah (Pt.4)

Par la grâce d'Allah mo pé continue mo 4<sup>ème</sup> partie Khutba Jummah lors bane attributs d'Allah après ene mois (4 semaines). Couma mo ti pé dire zot, Allah Li pas ena aucaine utilité pou cause menti. Li même Malik, Li même Rahman et Rahim. Li même *Al-Haqq*. Li rende clair la vérité kan bane dimounes servi toutes sortes de bane trucs et illusion pou embête bane dimounes. Nous fine trouve sa clairement dans l'exemple de Hazrat Moosa (as).

Donc, kan nous lire le Quran Shariff, fine présente aussi l'exemple de Hazrat Dawood (as). Allah (swt) dire ki ena deux dimounes ki fine sauter et fine rentre dans château de Hazrat Dawood (as) et zot fine dire li ki : *Ô Dawood, pas bizin to peur ; pas penser ki nous bane voleurs ou sois nous bane cambrioleurs ; pas nécessaire ki to faire aucaine tapage. En fait nous fine vine présente ene cas devant toi. Moi mo ena ene cabri, mais li (mo camarade là) ena 99. Li pé dire moi, donne li mo ene cabri ki mo ena là, de sorte ki li pou capave vine 100 (c.à.d. 100 cabri). Mais moi mo pé dire li ki mo ena ene seul et mo pas capave donne toi sa. Alors dire nous ki nous bizin faire.*

Donc Hazrat Dawood (as) fine donne so décision, mais toute suite li fine courber devant Allah (swt) et li fine penser ki Allah (swt) fine tester li. Allah fine tester li et aussi fine mette li en garde ki attention pou grandi to bane royaumes to mette l'intention et pression lors sa bane ti royaumes ki dans les environ là. Attention ki to alle commette bane excès.

Ena bane commentateurs fine mal explique sa, zot fine dire ki li ti ena 99 madames et li ti envie approprier ene 100<sup>ème</sup>, mais en fait c'est bane exagération. Eski zot pas conner ki li même ti le roi et tous royaumes ti pour li et pli joli madame ki li ti envie, li ti pou gagner parski dans sa l'époque là, le roi ti ena ene supériorité terrible. Donc, sa bane commentateurs là fine ena lizié fermer; zot accepter version de la Bible. Li tout à fait imaginaire.

En fait ti pé conseil Hazrat Dawood (as) ki Allah (swt) fine donne toi bane grand, grand royaumes et dans les environs de bane grand, grand royaumes ena bane tipti pays et beaucoup des fois ena le roi li tombe dans sa tentation là ki si sa bane tipti pays là aussi vine forme partie de sa grand royaume là, bé li ti pou ene bon zaffaire. Bé sa kalité tentation là parfois faire ou commette bane injustices.

En parlant de sa sujet là, li ti pou bon mo mette de l'avant ene question ki ene de mo bane disciples dans ene pays arabe fine mette devant moi, concernant saki mo fine dire à propos de l'explosion ki ti arriver à l'époque de Hazrat Salih (as). Mo reprend sa boute ki mo ti mentionner dans mon Khutba Jummah le 27 Mars 2020 :

**Le deuxième caractéristique d'ene punition divine c'est ki li soumette à ene certain condition ki pas la cause directe de sa calamité terrestre ou céleste ki pou manifester là.**

**Durant l'apostolat de Salih (as) (ki Allah ti envoyé à tribu de Thamud), fine ena ene explosion épouvantable. Pas ti ena aucaine relation entre explosion là et le fait ki bane malfaiteurs fine coupe jarrets d'ene chamelle.**

Saki mo pé faire comprend ici d'après bane connaissances ki Allah fine donne moi et ki Li-même fine faire moi comprend ki, fine bel et bien mentionner dans le Quran Shareef, dans Surah Al-Araf et Surah Al-Qamar ki sa c'est chamelle Allah sa, et ki li aussi ena so tour pou boire de l'eau. Mais bane malfaiteurs là fine désobéir

l'ordre d'Allah et pas fine laisse sa femelle chameau là boire à so tour, et zot fine coupe tendons de so la pâtes. Et verset plus devant mentionner ki après Allah fine envoie ene explosion, ou ene cri ou même ene grand tremblement de terre contre zot ki fine anéanti zot dans zot la caze.

Zot bizin conner ki couma mo fine dire zot, coupe jarrets de sa chamelle li pas la cause directe de sa punition là. Ce ki veut dire, ki c'est désobéissance ki zot fine montrer et ki zot fine accumulé à travers des années ki la cause directe de sa punition là, et non pas sa action de coupe jarrets là seulement. Allah pas puni ene sel coup Li. Li donne l'homme ou ene peuple entier ou même l'humanité dans so l'ensemble assez létemps pou repenti. Faudé ki peuple de Hazrat Salih (as) fine accumule so bane désobéissance et péchés à travers des années et des années kot finalement zot fine dépasse tous limites dans zot désobéissance envers Allah, sinon Allah pas ti pou puni zot. C'est des années de désobéissance ki fine amène sa grand punition là lor zot. Sa teste lors sa chamelle là ti la goûte d'eau ki déborde le vase.

Alors, c'est pour sa mo fine dire : **Le deuxième caractéristique d'ene punition divine c'est ki li soumette à ene certain condition ki pas la cause directe de sa calamité terrestre ou céleste ki pou manifester là.**

C'est sa la condition. Si peuple de Salih (as) ti montrer ene l'obéissance envers Allah So commandement et l'instruction du prophète pou pas coupe jarrets de sa femelle chameau là, alors peuple de Hazrat Salih (as), même ki zot ti encore *Kafir* (infidèle), zot pas ti pou recevoir sa punition là. **Mais c'est zot désobéissance ki zot fine accumuler à travers des années et des années ki fine cause zot la perte.**

Pareil couma pou Hazrat Dawood (as), couma mo ti pé explique zot, Allah ti pé tester li avec la présence de sa deux dimounes ki fine vine dans so la chambre pou présente ene cas devant li. C'est pas présence de sa bane dimounes là et zot zistoire ki compte, mais c'est teste et leçon ki Allah ti envie donne Hazrat Dawood (as). C'est sa ki principale dans sa récit du Quran là. Et Hazrat Dawood (as) fine fini comprend ki c'est bel et bien ene teste et ene grand leçon ki Allah fine faire avec li. Kot Allah pé faire li comprend ki faudé pas li gourmand de bane biens matériels de sa le monde là. Li bizin satisfait avec séki Allah fine donne li. Sinon, comme ene Khalifatullah li pas ti va fer correctement so travail. Mais kan Hazrat Dawood (as)

fine juger entre sa deux dimounes là avec justice, li fine comprend ki sa en fait appliquer pou li, et ki li bizin applique so propre jugement lors li-même.

Donc, mo retourne lors le sujet de mo Khutba. Puisque Allah Li le Maître absolu, bé Li péna même aucaine nécessité pou approprier bane zaffaires, faire gourmandise ou sois pou faire toutes sortes kalité tricks pou gagne bane zaffaires. Ni Li nécessaire cause menti et ni Li nécessaire commette bane injustices.

Et cette fois-ci Allah fine lier la qualité de « Maître » avec la qualité de « Vérité ». Pli devant kan mo explique verset là en détails, bé pour ena encore bane zaffaires bien intéressant ki pou vine en avant. Ki faire Allah (swt) fine lier attribut de « Vérité » avec « Maître ». Et en fait la raison li exactement couma mo fine mentionner.

« Malik » ena ene connexion avec la propriété. Si ene dimoune li maitre et si li donne à ene quelqu'un ene quelque chose et li pas donne à ene l'autre, bé sa li pas ene injustice. Li capave donne à celui ki li envie, parski li le maitre et tout bane zaffaires là appartenir à li et personne pas capave dire ki c'est ene injustice. Li gagne droit donne à celui ki li content. Personne pas capave dire ki : « *Guetter li fine donne untel et pas fine donne moi nannié.* »

Donc, sa c'est l'ignorance et rien d'autres. En fait attribut de vérité ou de justice li péna lien avec sa mais li ena connexion avec le Maitre. Kot, kot Quran fine lier sa là-bas fine mentionne Malik, mais malgré sa, ena sa dans le Surah Al-Fatiha. Parski *Malik Yaumid Deen* li appliquer lors tous les deux. C'est Li même ki prend décision, Li même le Juge et Li même le Maitre. Donc, pareil couma mo fine dire ki le mot *Haqq* connecter avec tout bane noms ki mentionner dans Surah Al-Fatiha.

De ce fait, gagne sa certitude complet là ki Surah Al-Fatiha li la maman de bane attributs d'Allah. Et pareil couma li la maman de Quran, coumsa même li la maman de tout bane noms d'Allah. Pour comprend bane noms d'Allah ou pou bizin faire référence avec Surah Al-Fatiha et alors le sujet pou vine pli claire.

Maintenant mo vine lors sa verset ki fine traitre sa sujet là dans différents aspects, différents l'angles. Jusqu'à présent mo ti pé cause lors verset kot fine mentionne ki faire bane dimounes cause menti, et à la lumière de sa nous gagne la certitude ki l'attribut de *Haqq* d'Allah profondément lier avec bane attributs de Surah Al-

Fatiha. Et ou capave prouver à 100% ki ene Être ki possède sa bane qualités là pas capave être ene menteur. Li impossible ki li ena quique connexion avec le mensonge. Et puisque fine ena rejet totale de tout aspects de mensonge, à cause sa Li connu comme « *Al-Haqq* » - la vérité complet et parfait ki péna aucaine lien, même de loin avec le mensonge.

Maintenant si ou réfléchi lors le mot *Haqq* dans sa place kot, kot Allah fine mentionne li, bé ou pou gagne beaucoup de lumière pou ou propre caractère et pou ou propre façon de vivre. Ou pou comprend Allah comme *Haqq* et ou pou ouler gagne avantages de Li. Ena ene zaffaire ki définitivement bizin accepter ki si ou priver de tout bane aspect de vérité, bé ou pas capave ena aucaine lien avec la vérité. Pour ki ena ene lien, bizin ena ene co-opération. Sans co-opération, connexion couper nette. Si ene dimoune coupe so connexion totale avec bane attributs d'Allah, bé li pou reste priver de tous bane avantages de bane attributs là. Alors li nécessaire comprend ki la vérité été et ki, ki bane avantages Quran fine mentionner pou la vérité. Ene certain avantage ki ou pou comprend toute suite. Mo fine choisir quelques versets comme l'exemple et peut être nous pou capave cause lors ene deux seulement.

Dans Surah Al-Anam Verset 62 et 63, Allah (swt) dire ki Li suprême lors So bane *banda*. Et en urdu kan servi le mot suprême, bé ou l'attention alle vers l'aspect négative mais en fait suprême c'est ene tel Être ki ena le pouvoir absolu. Ene Être ki capave puni si Li envie. Li ena capacité, sa pouvoir de punir là. Et si Li envie Li capave pardonner aussi. Li capave faire céki Li envie.

Donc, kan Li ena contrôle totale, à ce moment là nous dire ki Li suprême. Dans la politique humaine aussi sa mot là vini souvent ; kot ena frayeur pou ene l'autre être, là-bas suprême pas appliquer. Ena par exemple bane grands puissances ki sympathiser avec bane ti pays, parski sakaine ena ene frayeur de so camarade. Kan sa frayeur là fine casser, bé à ce moment là, la suprématie fine descende en forme de l'injustice. Pourtant sa ti là même, mais zot pas ti pé trouver parski sa suprématie là li prend l'aspect négatif kan népli ena aucaine frayeur pou personne. Donc, kan le mot suprématie vini en connexion avec Allah, bé li veut dire ki si Li envie Li capave détruire zot tout. Péna personne ki pou capave pose Li bane questions.

Mais puisque li *Hamid* aussi, alors malgré ki Li ena sa capacité là, là aussi Li pas détruire sa bane dimounes là. Et parfois bane dimounes là arrive à ene tel situation kot zot mérite bane punitions, là aussi Allah pas détruire zot. Fine dire ki si Allah ti envie, bé li ti capave élimine tout et détruire tout bane ki possède la vie pou bane péché ki zot faire, sitant bane dimounes plonger dans péchés. Mais puisque Li *Hamid*, Li ena courage extraordinaire, alors malgré ki Li suprême, Li pas montrer So aspect négatif mais Li montrer seulement So côté positif. Couma zot capave trouver, observer et réfléchi couma sa li ene sujet bien vaste pour traiter dans ene ou deux Khutbas. Li pas facile pou expliquer lors Allah (swt) So bane attributs. *Insha-Allah*, vendredi prochain, ki Allah (swt) donne sa humble serviteur là le *Tawfiq* pou continuer lors le même sujet. *Insha-Allah*.

Ki Allah (swt) guide sakaine parmi nous lors le droit chemin et ki nous comprend So bane attributs et So bane messages et avertissements pour le bien-être de l'humanité. *Insha-Allah, Ameen*.